

ANDREA TOFFALETTI

Canta le stéle

Editrice | UNI Service

Copyright© 2008 UNI Service - Trento
Prima edizione: settembre 2008 - *Printed in Italy*

ISBN 978-88-6178-248-8

In copertina: *Ponte di Castelvecchio* (Foto di Stefano Toffaletti)

Sito Internet dell'autore: www.larenadomila.it



www.uni-service.it

Novità - Catalogo - Acquisti on-line

‘Ntrodusiòn

Caro letór, Te ringràssio par aver cromptà stó libro, spero che’l té piàsa , se invésse nó l’è de tó gradimento no so ‘sa farghe: ormai te ghe l’è e té tóca te-gnértelo. Dopo el sucèssò del primo libro “Vorìa èssar un Cocàl”, vendù in tùto el mondo, ò pensà de stampàr ànca el secondo, “Canta le stéle”, una serie de poesie de vita a Verona, “çità de l’Amór”. I componimenti i-è vintisète, divisi in quatro capitoli: “Drénto Verona” ‘ndóe la nostra çità vién decantà in tùta la só belèssa, “Nel mé cór” esperiense amorese positive e negative, “Tuto e gnénte” un missiòto de emossióni e sènsassiòni, “Moràl de la vita” insegnamenti sui comportamenti de l’òmo . Gnénte bródi lónghi, nó té resta che léсарlo; te si uno dei tanti veronesi nel mondo che’l g’a vù el privilegio de conóssar la veronesità e soratuto el sotoscrito che dal 1999 el porta avanti con passión su internet, el sito in léngua veronese www.larenadomila.it. Un ringrasiamento el va ai mé familiari e a quanti i-è sta fonte de ispirasiòn, compresi bestie, statue e monumenti.

Verona, 16 setembre 2008

Andrea Toffaletti

Drénto Verona

Canta le stéle

Verona drénto al cór

Canta le stéle
vardàndo la luna,
che mé struca de òcio,
cunandose ne l'infinido
dei mé pensieri,
a cavàl dei mé sogni,
restando incantà,
denànsi a la mé Verona,
che la slùsega,
sóto al siél stelà.

Canta le stéle,
sóra ai quèrti, ai palàssi,
ai campanili, ai ponti,
carghi de storia,
carghi de saór,
de un parfùmo veronese,
che'l mé entra ne l'ànema,
sènsa 'n parché,
ma che mé tegno drénto co' amór
come 'na mama col so butìn.

Canta le stéle,
sóra l'Àdese brotolòn,
sóra la campagna insulsa,
sul Garda de pòcio,
come la mé facia,
bagnà da quéle làgrema,
che le vién zò,
una drìo l'altra,
come perle de rosàda,
sóra le fóie de un prà.

Canta le stéle,
sóra le cése, sui monti,
sóra la zénte de Verona,
speciàndose ne la réna,
quasi a volerla brincàr,
par far da coro ne l'Aida,
fasèndone sentir che le gh'è,
sempre tacà a noaltri,
come nostre amighe,
sempre fedeli.

Canta le stéle,
parando via quéle nùgole nere,
da la tó vita,
che no te voréssi conóssar,
che no te voréssi avérghe,
dandote 'na speransa,
che dimàn l'è 'n altro giorno,
che dimàn spónta el sól,
sóra Verona,
drénto de Ti !

brincàr: agguantare
denànsi: davanti
nùgole: nuvole
rosàda: rugiada
quèrti: tetti
slùsega: luccica